

Kolosi

Pol Kolosi bin bi kirop mij ñu kil tikak

1 ¹⁻²Yad Pol. God ne ke yip ag lek, Krai Jisas minim dad ameb bi alap midebin. Pen miñi mam cin Timoti yad eip mideb niñlig gi, nibep Krai Jisas nop niñ dil cig tep gil ai mam taun kib Kolosi midebin okok, mij nibaul ñu kil tikebin.

God Bapi cin nibep yimig niñil di tep gek, mid tep ginimib.

Pol Krai bin bi Kolosi okok sobok gil, God nop tep agak

³⁻⁴Agel nipin, nibi Krai Jisas niñ dil cig tep gil, bin bi nop niñ dipal okok kirop magilsek midmagil lipim. Nib ak, sobok gil, nibep gos niñil, per nep God Bi Kib cin Jisas Krai Nap ne ak nop tep apin. ⁵Karip lim seb kab ar alaṅ siṅak amil tap tep diñigabin, agil gos nipim ak me, nibi Krai Jisas nop cig tep gil, bin bi ne okok midmagil lipim. Minim niñid, Krai minim tep ak, ned apek, tap tep nibep seb kab ar alaṅ siṅak mideb ak bir nipim.

⁶Ned yib Krai minim tep ak niñil, God bin bi okok yimig niñil di tep gip minim yipil yib ak niñil, nibi ke ausek niñ dipim ñin ak tikek, Krai minim tep ak nibep nab adaṅ magil pilil kib tanil ameb rek ak, nib akniḅ rek nep me, karip lim tigoṅ tigoṅ kid kid magilsek okok, Krai minim tep ak amil bin bi nab kiri adaṅ magil pilil kib tanil ameb.

⁷Epapras, cin eip miñ wög gil, Krai nop wög per gi tep gip ak, nibep ned yib Krai minim tep ak ag ñak. Nig gak ak, cinop gi ñak. ⁸Epapras siṅaul apil, Kaun nibep nab adaṅ midek niñlig gi bin bi okok midmagil lipim ak, cinop ag ñak.

⁹Nib ak, Epapras ne ned yib cinop minim ag ñek niñnok ñin ak tikek, nibep nen agil God nop per nep sobok gipin. God nop sobok gil apin, nop tep ginimij ar ak nep, Kaun ne nibep gos ñek nibi gos niñ kid yikil tap tari God nop tep ginigab ak niñ tep ginimib, apin. ¹⁰Nib ak, Bi Kib bin

bi ne yib rek gi midil, nop tep ginimiņ ar ak nep gem amnimiņ. Niğ gil, tap tep ke ke koņai nep gi damil, God ne tigeþ bi rek mideb ak niņ tep yib ginigabim. Niğ gem, tap magil koņai nep pilnigab. ¹¹God ne Bi kilis akniþ ke yib melik sek mideb ak, ne kilis ne magilsek niþep ñek, niþi kilis ne dił, miķer ognap apek gos niþak ma niņil, gos sek midil, miñ miñ gilig gi, ¹²Bapi nop tep aqliğ gi mideniþib. Kraiþ bin bi ne kariþ lim per melik giþ siņak tap tep diņigal ak, Bapi ne niþep gek, niþi ak rek nep tap tep niþak diņigabim. ¹³Seten, bi kiþlim piþ okok kod mideb ak, cinop nag ñon gi kilis gek midonok ak pen God ne cinop wiþiþ yokek, miñi Ñi midmagil ne cinop di tep gil kod mideb. ¹⁴Ñi ne nep cinop nen ağıl kimil, miñ midonok ak wiþiþ yoķiþ; ne tap si tap timel giþin okok niņil kirig giþ.

Kraiþ tap okok magilsek kod mideb

¹⁵Nap God nop miþeņ niņjin rek ma lip ak pen Ñi ne me Nap rek mideb. Bin bi okok tap okok ma gi lak ñin ak, Ñi Nap eiþ midek. Bin bi okok tap okok magilsek piyak rek mideb; Kraiþ ne ar i pelokok mideb. ¹⁶Tap seb kab ar alaņ okok abe, tap lim dai ar wağin aul abe, tap uđin niþin okok abe, tap uđin ma niþin okok abe, kaun tap okok kod midebal okok abe, magilsek ne nep gi lak. Gi lak ak, Kraiþ yib ne ağıl ar amnimiņ ağıl gi lak. ¹⁷Kariþ lim biriariķ ped okok ma gi lak ñin ak, Kraiþ midek. Ne mideb ak me, tap okok magilsek kau kiri ke midil jim ñil mideb. ¹⁸Kraiþ ne nabic won rek mideb; bin bi ne okok, cöc ak, miþ goņ ne mideb. Ne gek cöc miþ goņ komiņ mideb. Ne wağin gil kimil kauyaņ warikak ak me, tap tari tari mideb okok piyak rek mideb; ne nep ar i pelokok mideb. ¹⁹God gos ne ke niņil gek, God ne mideb rek nep, Kraiþ niþ akniþ rek nep mideb. ²⁰Niþ ak, tap tari tari lim dai ar wağin aul mideb abe, kariþ lim seb kab ar alaņ siņak mideb abe, tap okok magilsek God eiþ jim ñinimiņ rek lip. Ned tap okok God nop kaual maual rek midoliğiþ. Pen Ñi ne, Nap ne ke mideb rek nep midil, maþ kros bak alaņ lakañ yapek kimil, miñi tap okok magilsek God eiþ di jim ñinimiņ rek lip.

²¹Niþi ned tap si tap timel gos niņliğ gi, niþ akniþ rek nep giliğ gi midil, God bin bi ñağ ñiņeb ne midil, par okok rek mideliğiþim. ²²Miñi pen Ñi ne miþ goņ lił kiķak rek, niþep di ne ke eiþ jim ñil lek, kariþ lim ne seb kab ar alaņ siņak amił, God uđin yiriķ ar ne siņak bin bi siņ, bin bi asiņ ma mideb, bin bi miniþ alaþ ma mideb, mideniğabim. ²³Pen niþi Kraiþ miniþ tep niņ diþim ak, kariþ saþ rek niņ diłiğ gi midil, God tap tep niþep ñinigab ak gos midmagil niþi nab adaņ kilis dił gos niņliğ gi mideniþib. Miniþ tep niþep ağıl niþim niþak, niþep nep mer, bin bi kariþ lim okok kiđ kiđ magilsek ağı ñel amiþ. Yad Pol ak rek nep wög ar niþak nep giþin.

Pol Krajs nop wög gek

²⁴Nibep nen agil Krajs minim tep ag ñen yip gi timel gel miker dipin ak, miñi yad miñ miñ gipin. Krajs ne ke miker kib yib dak ak rek, Krajs bin bi miker kib yib ñinimel, agil, Krajs miß goñ ne ak, cöc ne ak gi ñinim, agil, miß goñ yad miker ognap dipin.

²⁵God yip ag lek, nibep God Minim ak magilsek ag ñi tep gipin ak me, cöc ne ak nop wög gi ñeb bi alap midebin. ²⁶Minim tep nibak birarik okok mi koñai yib we gil midoligip pen miñi God ne Krajs bin bi ne kirop minim nibak miseñ lip. ²⁷God gos niñil minim ag lak ak, minim tep yib, minim melik sek we gil midoligip ak, bin bi okok magilsek niñnimel, agil, bin bi ne kirop miseñ yomnißab. Minim tep nibak wagin ak nig gil mideb: Krajs midmagil nibep nab adañ mideb; nib ak nibi karip lim seb kab ar alañ siñak amil, God melik ke sek siñak mideb eip per midenißabim. ²⁸Nib ak, cin Krajs nep ag ñibin. Kiri magilsek Krajs nop cig tep gilig gi, minim ne niñ tep gil, ageb rek nep gilig gi midenißal agil, cin gos niñ tep gil bin bi okok kirop magilsek timid ukil, Krajs minim tep ak ag ñibin. ²⁹Ar nibak nep, Krajs kilis timel ne ke magilsek yip ñib ak dil, kilis gil wög ne gilig gi midebin.

Nibep minim tom agenimel ak ma niñ ñinimib

2 ¹Pen niñim! Nibi Kolosi bin bi okok abe, Leodisia bin bi okok abe, bin bi ognap sek milik dai yad ma nipal okok abe, mid tep ginimib, agil, wög kilis yib gebin. ²Kiri gos sek midil, gos nokim alap nep niñil, pen pen midmagil lil, gos niñ kid yikil, God Minim we gil midoligip ak magilsek niñ tep ginimel, ag gos nipin. God Minim we gil midoligip ak Krajs. ³Krajs nop nab adañ nep God gos tep tep magilsek we gil mideb ak me, ne ke nep God gos tep nibak miseñ linimniñ rek lip.

⁴Bin bi ognap tom agil, minim kil tep ognap agel niñlig gi, minim esek kiri nibak niñ ñinimib rek lip, agil, nibep minim nibaul ag ñi tep ginim. ⁵Yad karip lim par siñaul midebin ak pen gos yad ak nibep piß ar midek niñlig gi, nibep gos niñlig gi midebin. Pen nibi Krajs nop niñ di kilis gil, kapkap midil, jim ñil midebim ak, yip tep yib gip.

Cin Krajs eip midil ne ageb rek nep gin

⁶Nibi Jisas Krajs nop niñ dil, Bi Kib cin agil dipim ak me, ar nibak nep niñil gem amniñniñ. ⁷Nibi Krajs nop cig tep gil, minim niñid ne ag ñel nipek ak niñ di kilis gil, ageb rek nep gil, God nop tep aglig gi nep mideniñimib.

⁸Pen niñ tep ginimib. Bin bi ognap nibep minim yokop minim esek agel, nibi minim esek nibak dil kid kiri okok amniñimib rek lip. Minim yokop minim esek apal ak, based sikop kesim kiri abe, kaun timel tap

okok lim dai wagin aul kod midebal okok kesim abe dil apal. Kraiss minim tep ak dil ma apal. ⁹Tari ginig: Kraiss mib goŋ sek mideb ak pen God mideb rek ak, Kraiss ne nib aknib rek nep mideb. ¹⁰God ne gek, nibi Kraiss nop cig gil, nop eip jim ñil midil, komiŋ yib midebim. Ne nep me, kaun timel tap okok lim dai wagin aul kod midebal okok magilsek ar i pelokok mideb.

¹¹Nibi Kraiss eip jim ñil midebim ak me, nibi bir Juda bin bi wak tib gi rik gipal rek ak midebim. Juda bin bi okok tu ñilik ñinmagil dil wak tib gi rik gipal, pen Kraiss eip jim ñil midebim ak me, ne tap si tap timel göligipim nag ak tib gi rik gip. ¹²Nibep ñig paklak ak, nibep Kraiss eip tigel gilak; nibi God kilis ne Jisas di warik ñak ak niŋ dipek ak me, God nibep Kraiss eip di warik ñek, bin bi komiŋ kisen nib ne midebim.

¹³Nibi ned tap si tap timel ar ak nep göligipim. Kraiss ne tap si tap timel göligipim nag ak tib gi rik ma gak ñin ak, nibi bin bi bir kimbak rek midebek. Pen God ne ke gek, miñi nibi Kraiss eip komiŋ midebim. God tap si tap timel gipin ak magilsek niŋil kirig gip. ¹⁴Tap si tap timel gipin okok, lo minim ke ke pen ñeb minim ñu kil tiklak ak, God di mab kros bak alaŋ cipil pak lek, pis nep dai juak. ¹⁵Mab kros bak alaŋ Kraiss ne kaun timel tap okok lim dai wagin aul kod midebal okok mok ne okok lil, bin bi okok niŋ midel niŋlig gi, kirop nag ñon gil di lip gi dad amnak.

¹⁶Ñig gak rek, nibi tap magil ognap okok ñig ognap okok ñibem, bin bi ognap nibep ag sikol genimel, gos par ma niŋnimib. Miñi God nop sobok gep ñin kib agil asik mosik ginigal ak kisen ma gem, nibep ag sikol genimel, gos par ma niŋnimib. Miñi takin kisen apeb ñin kib agil asik mosik ginigal ak kisen ma gem, nibep ag sikol genimel, gos par ma niŋnimib. Miñi Juda God nop sobok gep ñin kib agil asik mosik ginigal ak kisen ma gem, nibep ag sikol genimel, gos par ma niŋnimib. ¹⁷Kraiss ma owak ñin ak, tap nib okok kaunan rek niŋil göligipal; pen tap yib ak Kraiss.

¹⁸Nib ak, bin bi ognap apil, minim par lip gil, dai nipin rek, nibi nig ginimib, aka bin bi tam rek midenimib, aka ejol okok sobok agnimib, agenimel ak, minim kiri dil, God tap tep nibep ñinigab tap ak ma kirig ginimib. Bin bi nib okok, Kraiss minim tep ak ma nipal; gos kiri ke nep niŋil, gos esek okok nib okok nib dil, cin bin bi kib agil, kesim yokop par yib dipal. ¹⁹Bin bi nib okok, Kraiss nop kirig gil ar nibak ambal. Pen Kraiss ne nabic won midil, mib goŋ ne ak, magilsek kidil gol rek jim ñil lil, tap tep ñil, kod mid tep gek niŋlig gi, God nop tep ginimiŋ rek ak, mib goŋ kib gek ameb.

²⁰Kraiss cig gipim ak me, nop eip kimil, kaun timel tap okok lim dai wagin aul kod midebal okok mok kiri okok ma midebim. Tap alap nibep gi timel ginimiŋ rek kilis alap ma mideb. Nib ak, tari ginig bin bi okok gos nipal rek gos nipim? ²¹“Tap ak ñinmagil ma dinimib! Tap ak ma

ñiņnimib! Tap ak ma di niņnimib,” apal, ²²pen tap magil ñig tap apal tap okok magilsek ñibel kir ginigab. Minim kil tep ag ñibal okok magilsek bin bi gos ke niņil apal ar ak nep niņil ag ñibal.

²³Bin bi nib okok, ejol abe sobok gin agil, bin bi yim gep rek midon tep ginigab agil, tap asik mosik gil, koslam midebal. Nig gel, bin bi ognap niņel, minim niņid rek linigab ak pen tap si tap timel gep gos ak apek, tap esek okok nep gos niņil, Kraiss nop cig ma midebal rek, tap alap kilis ñek, mib goņ ke gos gip ak kirig ginimel rek ma lip.

God cinop gek, Kraiss eip wariknok

3 ¹⁻²Pen nibi Kraiss eip warikil komiņ kisen nib midebim ak, lim dai ar wagin aul tap okok gos ak ma niņnimib. Gos kib nibi ak amniņiņ tap karip lim seb kab ar alaņ mideb okok. Kraiss ne warikil ar alaņ siņak amil, God ñinmagil yipid pis ken ar ne siņak bisig mideb. ³Nibi Kraiss eip kimbek ak me, komiņ midep won nibi ak God Kraiss kirop apil mal eip we gil mideb. ⁴Komiņ midep won nibi wagin ak Kraiss. Kisen ne apeniņab ñin ak, amil ne eip melik akniņ ke sek mid tep ginigabim.

Ned mideligipim ak ke, miņi midebim ak ke

⁵Nib ak, tap tari mib goņ gos gip ak ñag pak linimib. Bin si bi si gil, gos timel niņil, abramek gil, tap si tap timel nep gin agil, agon kilnok kibap gol mani tap okok koņai nep din agil gem ma amniņiņ. Agon kilnok kibap gol mani tap okok koņai nep din ag gos nipal bin bi okok, kiri bin bi tap esek sobok gipal rek nep midebal. ⁶Ar nib okok nep gel, God kirop kal juek, yur kib yib dinigal. ⁷Nibi ke ned nag timel ar nibak nep gos niņil, nib akniņ rek nep göligipim. ⁸Pen miņi nag timel ar ak pis nep yem ginimib. Ned milik kal niņil, kal yib juil, gos timel niņil, bin bi okok kirop ag sikol gil, wasikil agil göligipim rek, miņi ma ginimib. ⁹Minim esek pen pen ma agnimib. Kraiss eip kimbek ak me, gi timel göligipim nag ak nibep waliņ rek kom kam gak ak, cibur gos midmagil ned nib nibi ak, tig asik ke okok yokpim. ¹⁰Cibur gos midmagil ned nib nibi ak tig asik yokil, cibur gos midmagil kisen nib nibi ak, waliņ rek tol gi lipim. Bin bi kisen nib midil, God nibep gi lak ak per nep gek, nibi ne ke mideb rek nep lil, nop niņ tep yib ginigabim. ¹¹God niņ gak ak me, Grik bin bi okok ke, Juda bin bi okok ke ma midebal. Bin bi wak tib gi rik gipal okok ke, bin bi wak tib gi rik ma gipal okok ke ma midebal. Bin bi mij ñu kil uđin li nipal okok ke, bin bi mij ñu kil uđin ma li nipal okok ke ma midebal. Bin bi kasik okok ke, bin bi kibol okok ke ma midebal. Bin bi tau dam lel nag wög gipal okok ke, bin bi gos kiri ke niņil wög gipal okok ke ma midebal. Bin bi kisen nib midobin ak me, Kraiss ne ke nep cinop magilsek midmagil nab adaņ midek niņlig gi, tap ognap magilsek tap yokop rek lip.

¹² God bin bi ne midebim. Ne nibep midmagil lil, bin bi ne ke ag lak. Nib ak, walij tol gi lipal rek, gi tep gep nag ak tol gi linimib. Bin bi okok kirop yimig niñil, di tep ginimib; yib nibi ke agem ar ma amniniñ; bin bi sain tep midenimib; bin bi okok minim sisain agil kal ma junimib.

¹³ Kraiss bin bi ne ognap nibep gi timel genimel, kirop pen gi timel ma ginimib. Minim ognap mideniniñ, Bi Kib ne nibi tap si tap timel gipim niñil kirig gip rek ak, bin bi okok nibep gi timel genimel ak, nibi ak rek nep niñil kirig ginimib. ¹⁴ Pen nibi nag tep nibak tol gi lil, söñ ar pelak midmagil lep magil ak tol gi linimib. Bin bi midmagil lep magil ak, tap tep okok magilsek kom kam di jim ñil lek, tap tep alap ulep ma gininiñ.

¹⁵ God nibep dil miñ goñ nokim nep jim ñil lak ak, nibi kapkap midil pen pen di tep ginimib agil gak. Nib ak, Kraiss cibur sain sain ñib ak nop ag niñil, midmagil nibep nab adañ cibur sain sain magil nibak lek, nibi kapkap midil, tap tari nop tep ginigab ak niñigabim. Nib ak, nop tep aglig gi nep midenimib. ¹⁶ Kraiss minim tep ak nibep nab adañ ap ran jakil rek mideniniñ niñlig gi, minim ne ak niñ tep yib gil me, pen pen ag ñi tep gilig gi, God Minim dai Sam ognap, God yib ne dap raneb kimep ognap aglig gi, God nop tep aglig gi midenimib. ¹⁷ Pen minim agnig aka tari tari ginig, Bi Kib Jisas bin bi ne midobin agil, God Jisas kirop apil mal tep aglig gi nep gem amniniñ.

Kraiss bin bi ne okok mid tep ginimel

¹⁸ Nibi bin okok, nibi Kraiss niñ dipim rek, nagimil sikop minim agnimel rek kisen ginimib.

¹⁹ Pen nibi bi okok, bin nibi okok kirop minim kilis agil ma agnimib; kirop midmagil linimib.

²⁰ Nibi ñi pai okok, nibi Kraiss niñ dipim rek, nanim nap agnimir rek magilsek kisen ginimib. Niñ ginigabim God nop tep ginigab.

²¹ Pen nibi nap sikop, ñi pai nibi okok kirop minim kilis agil agem agem, gos timel niñil, mid tep ma ginimel rek lip ak, niñ tep ginimib.

Bin bi miñ wög gipal okok; bi kib kiri okok

²² Nibep bin bi, bi ognap miñ ñon gi dapel, kirop miñ wög gi ñibim okok, minim ognap agnig gebin. Bi kib niñ midebal won ak nep niñ midel niñlig gi wög gon, kirop tep gañ, agil ma ginimib. Gos omal ma niñil, Bi Kib cin seb kab ar alañ ak niñ mideb rek, gi tep gin, agil, tep gek niñlig gi ginimib.

²³ Nibi tap tari tari ginigabim, bin bi lim dai ar wagin aul ognap kirop wög gobin, agil, ma ginimib; Bi Kib seb kab ar alañ ak nop wög gobin, agil, kilis gil gos tep niñlig gi ginimib. ²⁴ Wög gi ñebim ak, Bi Kib Kraiss nop wög gi ñebim. Nibi nipim Bi Kib ne pen ñil nibep tap tep ñinigab. ²⁵ Pen God ne bin bi gi timel ginigal okok minim kib agnig, bin bi kib okok ke, bin bi sikol okok ke agil, minim kib ma ginigab; ar nokim ak nep agil, yur ñinigab.

4 ¹Nib ak, nibi bi kib rek midebim okok, Bi Kib nibi seb kab ar alan mideb ak gos niŋlig gi, bin bi nibep miñ wög gi ñibal okok kirop kod mid tep gil, tap kirop ñeb rek ak abramek ñinimib.

God nop sobok gilig gi midenimib

²Nibi gos niŋ tep gilig gi, tep aglig gi, God nop sobok gilig gi midenimib. ³Cinop ak rek nep God nop sobok gilig gi midem, God ne kanib yikek, Krai minim tep we gil midoligip ak bin bi okok kirop misen ag ñinigabin. Krai minim tep ak nep ag ñi ajen, yip miñ lel midebin. ⁴Pen God nop sobok gem, yip kod midek niŋlig gi, minim nibak ag ñi tep gen, bin bi niŋ tep ginimel. Yad akni rek nep ginim ak tep.

⁵Nibi per nep gos niŋlig gi midem, kanib yikniŋ, bin bi Krai nop ma niŋ dipal okok, nibi gos niŋ tep gilig gi, kirop di tep gil, Krai minim tep ak ag ñinimib. ⁶Meg miŋan nibi ak dek sol dek kal rek loniŋ. Niŋ gek, bin bi minim nibep niŋel, yidek gek, niŋ tep ginigal. Nibep minim tari rek ag niŋigal, kirop pen ag ñi tep ginimib.

Pol Ticikas Onesimas bi omal kirop ag yokak

⁷⁻⁸Mam midmagil cin Ticikas, yad Bi Kib nop wög kilis gipin rek gip ak, ag yoken niŋigab. Ne midebim siŋak amil, yad titi rek gi midebin ak nibep ag ñek niŋil miñ miñ ginimib, agil, ag yokniŋain. ⁹Pen mam midmagil cin Onesimas, bi nibi ke ak, Ticikas eip niŋigair. Onesimas ne ak rek nep, yad Bi Kib nop wög kilis gipin rek, ak rek nep gip. Amil, tap tari tari siŋ aul gip ak magilsek nibep ag ñi tep ginigair.

Pol minim ag dai juak

¹⁰Bi Aristakas, yad eip miñ midobir ak abe, bi cin Mak abe nibep, “Midebim?” agebir. Mak me, bi cin Banabas nimid ne ak. Bi nibak nep ned minim yokil agnek, “Nop piyak siŋak amjakek di tep ginimib,” agnek. ¹¹Bi cin Jisas, yib ne alap Jastas apal ak, ak rek nep nibep, “Midebim?” ageb. Bi Juda omal nokim nib okok me yad eip wög jim ñil gipin. Juda ognap yip gos ke ke niŋil wög jim ñil ma gipin; kiri yakam nep yad eip God bin bi dil kod midenigab minim tep ak ag ñibin.

¹²Bi nibi Epapras, Krai Jisas nop wög gip ak, nibep, “Midebim?” ageb. Ne per per kilis gil nibep God nop sobok gil agip, “Kiri gos ognap ma niŋil, Krai minim tep ak niŋ di kilis gil, nop cig tep gil, nak agninin rek nep gel amniŋiŋ,” ageb. ¹³Udin yad ke niŋil nibep agebin, Epapras ne kilis gil nibep wög gil, Leodisia bin bi kirop wög gil, Hirapolis bin bi kirop wög gil geb.

¹⁴Pen bi tep cin, soi ñon gep bi Luk abe, Demas abe nibep, “Midebim?” agebir. ¹⁵Ai mam taun kib Leodisia midebal okok, bin bi apil bin Nimpa kariŋ God nop sobok gipal okok kirop magilsek, “Pol nibep, ‘Midebim?’ ageb,” agnimib.

¹⁶Nibep mij yokebin aul niñil, ñem amek, Krais bin bi Leodisia midebal okok ak rek nep niñnimel. Pen Leodisia bin bi kirop mij yokpin ak, nibi ak rek nep dil niñnimib.

¹⁷Pen Akipas nop agnimib, “Bi Kib wög nep ag lak ak gi dinimin,” agnimib.

¹⁸Yad Pol, miñi ñinmagil yad ak ke, minim dai magil aul ñu kil tikebin. Yip sen dil miñ kilis lipal ak, yip saköl ma ginimib. God nibep yimig niñil di tep gek, mid tep ginimib.